


Ni Presidente
Thomas S. Monson



Maipapan iti Panagbalin a Naespirituan a Nakasagana

Balakad manipud iti Propetatayo

Maysa a Pundasion ti Pammati

“No awanantayo iti nauneg a pundasion ti pammati ken natibker a pammaneknek iti kinapudno, mabalin a marigatantayo a mangsarked kadagiti narungsot a bagyo ken nalam-ek nga angin ti rigat nga umay a di mapakpakadaan iti tunggal maysa kadatayo.

“Ti mortalidad wenno ti panagbiag iti daga ket maysa a panawen ti pannubok, maysa a panawen tapno paneknekantayo ti bagbagitayo a maikaritayo nga agsubli iti imatang ti Nailangitan nga Amatayo. Tapno masuboktayo, nasken a mapadasantayo dagiti pannubok ken pagrigatan. Dagitoy ti mabalin a mangdadael kadatayo, ket mabalin a maupay ken agsisina dagiti karuaratayo—, dayta ket , no dagiti pundasion ti pammatitayo, dagiti pammaneknektayo iti kinapudno ket saan a nauneg ti pannakaipasdekda iti kaunggantayo.”¹

Agsursuro kadagiti Adalen ti Napalabas

“Iti panagsapsapul iti kasaayatan a bagitayo, sumagmamano a saludsod ti mangtarabay iti

panagpanunottayo: Siak kadi ti kayatko a pagbalinan? As-asidegak kadi iti Mangisalakan ita ngem idi kalman? As-asidegakto ngata inton bigat? Addaanak kadi iti tured nga agbalbaliw para iti nasaysayaat? . . .

“Dimtengen dagiti tawen ket naglabasen dagiti tawen, ngem ti panagkasapulan iti maysa a pammaneknek maipapan iti ebanghelio ket nasken nga agtultuloy. Bayat ti panagaddangtayo nga agturong iti masakbayan, nasken a ditay liplipatan dagiti adalen ti napalabas.”²

Ti Bukodmo a Liahona

“Ti bendisionmo iti patriarka ket kukuam ken sika laeng ti akinkukua. Mabalin a daytoy ket ababa wenno atiddog, simple wenno nauneg. Ti kaatiddog ken lengguahe ket saan a makaaramid iti bendision ti patriarka. Ti Espiritu ti mangipakaammo iti pudno a kaipapanan. Nasken a saan a makulpi ken maidulin ti bendisionmo. Nasken a saan a maikuadro wenno maipablaak daytoy. Ngem ketdi, nasken a basaen

daytoy. Nasken nga ipateg daytoy. Nasken a suroten daytoy. Ti bendisionmo iti patriarka ti mangtulogto kenka kadagiti karigatan a pannubokmo. Daytoy ti mangtarabayto kenka kadagiti pagpeggadan ti biag. . . . Ti bendisionmo iti patriarka ti bukodmo a Liahona a mangidalan ken mangtarabay kenka iti pagnaam.

“Mabalin a kasapulan ti anus bayat ti panagbantay, panaguray, ken panagtrabahotayo para iti pannakatungpal ti naikari a bendision.”³

Umasidegka Kenkuana

“Laglagipem a dika magmagna nga agmaymaysa. . . . Bayat ti pannagnam iti biag, kanayon a magnaka nga agturong iti lawag, ket agtinnagto dagiti anniniwan ti biag iti likudam. . . .

“Bayat ti pananglukibko kadagiti nasantuan a kasuratan para iti pammaregta, maysa a naisalsalumina a balikas ti naulit-ulit a nakita. Ti balikas [ket] ‘umay.’ Kinunana ti Apo, ‘Umaykayo kaniak.’ Kinunana, ‘Umaykayo agsursuro kaniak.’ Kinunana pay, ‘Umaykayo, surotendak.’ Kayatko dayta a balikas, *umay*. Ti pakaasik ket umaytaytayo koma iti Apo.”⁴

DAGITI NAGADAWAN

1. “How Firm a Foundation,” *Liahona*, Nob. 2006, 62.
2. “Becoming Our Best Selves,” *Liahona*, Abr. 2006, 3, 5.
3. “Your Patriarchal Blessing: A Liahona of Light,” *Ensign*, Nob. 1986, 66.
4. 16-stake fireside, Brigham Young University, Nob. 16, 1986.

PANANGISURO MANIPUD ITI DAYTOY A MENSAHE

Ti *Teaching, No Greater Call* ipalawagna: “Ti naling a mannursuro saanna a pampanunoten, . . . Ania ti isurok ita nga aldaw?’ ngem ketdi, ‘Kasano a matulongakto dagiti sursuruak a mangtakuat iti no ania ti nasken a maammuanda?’” ([1999], 61). Tapno matulongan dagiti individual a makasursuro manipud iti daytoy nga artikulo, ibilangmo ti panangted kadakuada iti papel ken lapis ken panangted kadakuada iti panawen a mangbasa kadagiti balikas ni Presidente Monson ken mangisurat kadagiti kinapudno a matakuatanda maipapan iti panagbalin a naespirituan a nakasagana. Mabalin dagiti in-inaudi nga ubbing ti agdrowing kadagiti ladawan maipapan iti sursuruenda. Ibilang ti panangpaibinglay kadakuada iti no ania ti insurat wenno indrowingda.

AGTUTUBO

Ti Bendisionmo iti Patriarka

Inladawan ni Presidente Monson ti bendision ti patriarka a kas “bukod a Liahona a mangiturong ken mangtarabay kenka iti dalanmo.” Ngarud, ania daytoy a bendision, ken kasano a makatulog daytoy a mangtarabay iti biagmo?

Ania ti bendision ti patriarka?

Ti bendisionmo ket addaan iti dua a kangrunaan a panggep. Umuna, ibunannagnanto ti nagtaudam a puli, wenno ania a tribu iti balay ti Israel ti pakaibilangam. Maikadua, aglaonto daytoy iti pakaammo a tumulong a mangtarabay kenka. Ti bendisionmo ket mabalin nga aglaonto kadagiti kari, pammagbaga, ken ballaag.

Mano ti nasken a tawenko nga umawat iti bendisionko?

Awan ti naituding a tawen, ngem nasken nga adda anka iti naan-anay a nakem a mangipateg iti sagrado a kasasaad ti bendision. Adu a miembro ti mangrugi a mangpanunot maipapan iti panangawat kadagiti bendisionda kadagiti nasapa a tawen ti kinaagtutuboda.

Kasano nga awatek ti bendision?

Umuna, kasaritam ti bishop wenno branch presidentmo. No nakasagana ken maikarika, awatemto ti maysa a rekomenda. Kalpasan dayta, mabalinmo ti mangiske-diul iti pannakipagkita iti patriarka iti lugaryo.

Ania ti aramidek iti bendisionko?

Idulinmo daytoy iti natalged a lugar, ken masansan a basaem daytoy. Laglagipem, sagrado ken bukodmo ti bendisionmo. Mabalinmo nga isarita daytoy kadagiti asideg a miembro ti pamilia, ngem nskan a saanmo nga isarita daytoy iti kaaduan. Kasta met, nga amin a bendision a nadakamat iti bendisionmo iti patriarka ket maibatay iti kinapudnom ken iti panawen ti Apo.

DAGITI UBBING

Maysa a Natibker a Pundasion

Kinuna ni President Thomas S. Monson a nasken a mangbangontayo iti “maysa a natibker a pammaneknek iti kinapudno.” Maysa kadagiti kasayaatan a wagas tapno maaramid daytoy ket isu

ti panagbasa kadagiti nasantuan a kasuratan. Kita-
en dagiti bersikulo iti baba. Mangisurat iti maysa a
banag a masursurom iti tunggal bersikulo a makatu-
long a mangpatibker iti pammaneknekmo.

Mormon 7:5

Pagannurotan ti Pammati 1:10

Moroni 10:5

DkK 11:12

Moroni 7:41

DkK 1:37

Taga-Efeso 6:11

© 2009 ti Intellectual Reserve, Inc. Nailatang amin a karbengan. Naimaldit iti
EUA. Pannakaanamongna iti Ingles: 6/09. Pannakaanamongna a maipatarus:
6/09. Pannakaipatarus ti *First Presidency Message, February 2010*. Ilokano.
09362 864

Nainsiriban a Panangtarawidwid kadagiti Sanikuatayo ken Panangliklik iti Panagutang



*Isuroyo dagitoy
a nasantuan a
kasuratan ken
naadaw a sao, no*

*kasapuln, sabali a pagbatayan a
mangbendision kadagiti kakabsat a
babbai a sarungkaranyo. Iburayyo
ti pammaneknek maipapan
iti doktrina. Awisenyo dagiti
sarungkaranyo nga iburayda no
ania ti narikna ken nasursuroda.*

Panangtarawidwid kadagiti Sanikua

“Ti nasaluad ken nasalimetmet a panagbiag’ . . . kaipapananna ti [panangtaginayon] kadagiti sanikuatayo, ti nasirib a panagplano kadagiti banag a pakaseknan iti kuarta, naan-anay a gastosen para iti bukod a salun-at, ken naan-anay a panagsagana para iti edukasion ken panangpadur-as iti karera, panangted iti maitutop nga atensyon iti panagpataud ken panagurnong iti pagtaengan kasta met ti panangpasaayaat iti simbeng ti panagrikna. . . . No agbiagtayo a nasayaat ken nasaluad, natalgedtayonto a kas iti kaadda iti dakulap ti imana.”¹

*Presidente Spencer W. Kimball
(1895–1985).*

“Ania dagiti paglaingan a kasapulantayo a makatulong kadayo nga agbalin a mapagpannuray iti bukod a kabaelan? . . . Kadagiti

nagkauna nga aldaw ti Simbaan, impakaasi ni Brigham Young kadagiti kakabsat a babbai a sursuruenda ti manglapped iti sakit kadagiti pamilia, mangipatakder kadagiti industria iti pagtaengan, ken agadal maipapan iti panagaywan iti kuarta ken panangimaton kadagiti libro ti negosio ken daduma pay a mausar a paglaingan. Maus-usar pay laeng ita nga agdama dagita a prinsipio. Agtultuloy ti kinapateg unay ti edukasion.

“Sinaludsodko ti sumagmamano a bishop no ania dagiti paglaingan ti panagpannuray iti bukod a kabaelan a kasapuln unay dagiti kakabsat a babbai kadagiti wardda, ket kinunada a daytoy ket panagbadyet. Nasken a maawattan dagiti babbai dagiti implikasion ti panagatang babaen ti utang ken saan a panagbiag iti uneg ti badyet. Ti maikadua a paglaingan nga inlista dagiti bishop ket panagluto. Dagiti taraon a maisagana ken makan iti pagtaengan ket gagangay a nalaklaka ti gatadda, nasalsalun-at, ken makatulong a mangpapigsa kadagiti relasion ti pamilia.”²

*Julie B. Beck, sapasap a presidente
ti Relief Society.*

Panangliklik iti Panagutang

“Mangisingasingak man iti lima a kangrunaan nga addang iti wayawaya iti pakaseknan iti kuarta. . . .

DAGITI TULONG PARA KADAGITI VISITING TEACHER

Agbinnalakadkayo iti kaduam maipapan iti no kasano nga ibagay a siririkna daytoy a mensahe kadagiti kasasaad ti tunggal kabsat a babai. Ania dagiti paglaingan iti panagpannuray iti bukod a kabaelan ti mabalinmo nga ibinglay kenkuana?

Bukod a Panagsagana

Malakias 3:10

Mateo 6:19–21

Lucas 12:15

DkK 38:30;88:119

Para iti ad-adu pay a paakammo, kitaen iti *All Is Safely Gathered in Family Finances* (aytem blg. 04007)

*“Umuna, bayadam ti
apagkapullom.*

*“Maikadua, aggastoska iti
basbassit ngem ti matgedam*

*“Maikatlo, sursuruem ti
agurnong (iti kuarta).*

*“Maikapad, dayawen dagiti obli-
gasionmo iti pakaseknan iti kuarta.*

*“Maikalima, suruam dagi-
ti annakmo a mangsuot iti
pagwadam.”³*

*Elder Joseph B. Wirthlin (1917 – 2008)
ti Korum dagiti Sangapulo-ket-dua nga
Apostol.*

“No agutangtayo, ipadawattayo ti sumagmamano a napateg, di magatadan a kinawaya a panagpilitayo ken ipasangotayo dagiti bagitayo iti impataytayo mismo a pannakaadipen. Yobligatayo ti panawen, pigsa,

ken pamuspusantayo tapno mabayadantayo ti binulodtayo—dagiti sanikua a mabalin a maaramat tapno makatulong iti bagbagitayo, kadagiti pamiliatayo, ken kadagiti dadduma.

“Tapno mabayadan dagiti utangtayo itan ken tapno maliklikan ti panagutang kasapulantayo nga ipakita ti pammatitayo iti Mangisalakana—saan langa *agaramid* iti nasaysayaat ngem ketdi tapno *agbalin* a

nasaysayaat. Kasapulan ti napigsa a pammati tapno baliksen dagidiay simple a balikas, ‘Saanmi a kabaelan daytoy.’ Kasapulan ti pammati tapno agtalek nga agbalinto a nasaysayaat ti panagbiag bayat ti panangisakripsiotayo kadagiti tartarigagayantayo tapno mapaaddatayo dagiti kasapulantayo ken dagiti kasapulan dagiti dadduma.”⁴

Elder Robert D. Hales ti Korum dagiti Sangapulo-ket-dua nga Apostol.

DAGITI NAGADAWAN

1. “Welfare Services: The Gospel in Action,” *Ensign*, Nob. 1977, 78.
2. “The Welfare Responsibilities of the Relief Society President,” *Basic Principles of Welfare and Self-Reliance* [2009], 5.
3. “Earthly Debts, Heavenly Debts,” *Liahona*, Mayo 2004, 41, 42.
4. “A Gospel Vision of Welfare: Faith and Action,” *Basic Principles of Welfare and Self-Reliance* [2009], 1.

© 2009 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/09. Pannakaanamongna a maipatarus: 6/09. Pannakaipatarus ti *Visiting Teaching Message*, February 2010. Ilokano. 09362 864